

Untervazer Burgenverein Untervaz

Texte zur Dorfgeschichte von Untervaz



2022

Lebenslauf von Peter Hug-Zimmermann

Email: dorfgeschichte@burgenverein-untervaz.ch. Weitere Texte zur Dorfgeschichte sind im Internet unter <http://www.burgenverein-untervaz.ch/dorfgeschichte> erhältlich. Beilagen der Jahresberichte „Anno Domini“ unter <http://www.burgenverein-untervaz.ch/annodomini>.



**Lebenslauf von
Peter Hug-Zimmermann
(1940 - 2022)**

*vorgelesen in der Kath. Kirche
während der
Abdankung*

Lebenslauf von Peter Hug-Zimmermann

Liaba Täta es isch a grossi Ufgab für us gsi dina Läbenslauf z schriba, wills üs an so viel schöni Stunda erinneret hät und will du so viel Plän im Läba gha häsch.

Du bisch immer dina eiga Wäg ganga. Kei Arbet isch dier z viel gsi.

Du häsch erscht in da letschta Johr gmerkt, dass Ferie eigentlich au no schön wären. Darum bisch du denn ab und zua, spontan für 2 bis 3 Täg ins Südtirol gfhara oder häsch sus a kurza Usflug gmacht.

Am Fahra häsch halt immer Freud gha und wenn dier dia grossa schöna Laschtwäga entgega cho sin, hät dis Herz höher gschlaga.

Am 17. Februar 1940 bisch du in der Vordergass uf d Wält cho. A guats Johr spöter, isch dini Schwöschter Gretli gebora.

1951 bisch du mit dinera Familia uf Trimmis in da Costams züglet, wo dini Eltera dr Wingert vum Bistum pflägt hän und drzua no puuret hän.

Döt häsch du a schöni Jugend dörfa erläba. Noch dr Schualzit bisch du in d Molinära als Knecht ga schaffa. Schu döt häsch denkt, wettisch au amol Puur werda. Denn häsch aber plötzlich d Lidaschaft vum Laschtwaga fahra entdeckt und bisch viel Johr in der ganza Schwiz ga Getränke abhola, für d Firma Casutt und d Firma Wolf.

Eines Tages sin im Keller öpa 20 Harass gstanda und dini Eltara hän sich Sorga gmacht, wia du dia wieder weg bringsch. So hät das mit däm Getränkehandel agfanga.

Au z Schwinga isch a Lidaschaft gsi vu dier, aber wo du amna Pfingschtmintig dr Oberarm brocha häsch, isch d Aktivkarriera beendet gsi. Als Fän bisch natürlich noher, so viel wia möglich dabei gsi.

Z Mels häsch denn d Vrena Zimmermann kenna glert und 1965 hän iehr zwei ghürota. 1966 sinder zrugg uf Vaz in d Hintergass züglet.

Zu eurer grossa Freud hän iehr dr Werner, z Heidi und d Irene übercho.

Ds Lager und dr Hof in dr Hintergass sin langsam z chli worda für dia viela Harass, drum häsch du denn 1979 z Bawangs a Lagerhalla baut.

Mit viel Fliss isch dier das alles guat glunga, dass dini Kinder dä Betrieb hüt no dörfen witer fūahra.

Noch sechzgi häsch dier denkt, dass es dier in dr Pension no z langwielig chönti werda und denn häsch dier drei Galloway-Rinder kauft. Und so hät sich au z puura verwürklicht.

Zitawis häsch über 20 Tier gha und es isch meh als a Hobby worda. Und immer no häsch Energie ka zum im Getränkehandel mit z helfa.

Jo, Plän häsch immer a hufa gha. Mängmol hämmer fascht nid mithalta möga, will mier jo au no üseri eigna Sacha gha hän.

An dina 9 Enkel häsch a grossi Freud gha und bisch sehr stolz uf sie gsi.


Häsch immer gära tanzt und Musik glosset und bisch a offena, kontaktfreudiga Mensch gsi. In da junga Johra häsch au selber Handorgla gspielt, noher aber leider kei Zit meh dafür gfunda.

Vor zwei Mönnet isches leider ganz plötzlich mit dinera Gsundheit abwärts ganga und mier hetten nia denkt, dass mier di so schnell verlüren.

Überall wo mier sin, fälsch du.

Überall wo du gsi bisch, vermessen mier di.

Du blibsch für immer in üserna Herza.



*Deine Liebe, deine Wärme,
deine Herzlichkeit, dein frohes
Lachen, alles ist verstummt.
In unseren Herzen lebst du weiter,
wir alle vermissen dich sehr.*

Abschied und Dank
Nach kurzer schwerer Krankheit nehmen
wir traurig Abschied von unserem geliebten
Ehemann, Vater, Schwiegervater, Neni,
Bruder und Schwager

PETER HUG-ZIMMERMANN
17. Februar 1940 bis 2. Juni 2022

Die Trauerfamilie
Verena Hug-Zimmermann
Werner Hug und Partnerin
mit Patricia, Daniel und Seraina
Heidi und Norbert Berni-Hug
mit Dario, Tamara und Nelia
Irene und Michael Bieler-Hug
mit Norina, Nando und Robin
Gretli und Seppli Dünser-Hug
Partner/innen, Verwandte und Freunde

Traueradresse
Verena Hug-Zimmermann
Kreuzgasse 5
7204 Untervaz

Der Abschiedsgottesdienst findet am
Pfingstmontag, 6. Juni 2022, um 15 Uhr
in der katholischen Kirche Untervaz statt.

Internet-Bearbeitung: k. j.

Version 06/2022
